

On vî chalé liyon, mwinre èt plin d' rumatisses  
Dimandeûve à tote fwace qu'on v'nîche po l' radjon.ni ;  
Mins s'on-z-invente dès drogues qui r'faîyenut dèl djanisse,  
I n'ègzistéye co rin qu'èspêche di disflani.  
Quî ç' qui wasereut dîre ça sins rîre au rwè dès biesses ?  
Lès chèfs di totes lès soces, tortos au pus syincieûs,  
Qui, rin qu'en lès vèyant, on s' dit : " Ça, c'è-st-one tièsse ! "  
Ni polenut mau d' passer po dès fayés r'bouteûs.  
I s'ont côpé è quate po trover l' boune ricète :  
Onk ni tûze qui régime, po l'ôte, c'èst si r'pwaser ;  
Nin quèstion d' lî sofler qu'il a ça à sès guètes,  
Ni qu' c'èst l's-anéyes lès causes, s'il èst bin rassonré.  
Li r'naud, come d'abitude, a sogne di s' mète è cwète ;  
Li leup, pinsant bin fé, li kèdje di tos lès maus.  
« Mi fé parèy afront, dji nè l' saureu admète ! »  
Di-st-i, li rwè, choqué. « Qu'on m' l'amwin.ne, i mè l' faut ! »  
Nosse vèchau qu'a compris tos lès toûrs, lès maneûves,  
Si présinte tot pitieûs, boûriaté, maleureûs :  
« Dji vou wadjî qu'on v's-a v'nu raconter qu' dji n' v'leûve  
Nin acouru d'lé vos, mins dj' n'aureu jamaîs seû !  
C'èst qu' dj'aveu dècidé d' fé on pèlèrinadje  
Dins l'èspwêr di vos fé r'trover djôye èt santé ;  
Èt là, dj'a rèscontré dès djins qu' dj'î a fiyadje  
Qui m'ont acèrtiné qu' li r'méde, c'èst v' rèstchauffer.  
I vos faut prinde on leup èt lî chwarchî s' garguète,

Aclaper s' pia bin tchôte su l' vosse, èt sins taurdjî ;  
Gn-aurè todi dès droles qui vos traîteront d'aguète,  
Mins c'est, d'après ç' qu'on dit, l' seule façon di v' sognî. »  
Li liyon l'a choûté : foute li tièsse djus à l'ôte,  
Discôper, aprèster, mougî l' tchau po soper,  
Èfiler l' pârdèssus tot d'jant qu' c'est l' novèle môde !  
Li r'naud, qu'èst l' pus malin, èst co todi chapé.  
Vos-ôtes, lès chârlatans, po bin fé avou l' maïsse,  
Vos nwârichoiz l' soçon tot pinsant -z-î gangnî ;  
Tot ç' qui v' purdoz aus-ôtes, n'îrè nin dins vosse caïsse !  
C'èst qu' tofêr li vint toûne èt gn-a pus qu'à r'machî.

Aguète : vache médiocre

Albert Delvaux